

بلوفر قديم

في وسط الدولاب المرشق هدوم
بلوفر قديم

رمادي و ساده بدون بهرجه
مينفعلكيش تحضري به مناسبه
ولا عاد بينفع خروجه صحاب
في وسط الدولاب المرشق هدوم
بلوفر منسل وجع م الجناب
نهما خدمته حتى م الشماعات

بقاله حوالي

سنتين وداخل

في تالت سنه

مبقع ومرمي في وسط بجامات
عشان لما ينخر جنابك هوا
في برد الليالي
يومين في السنه
تجيله و فاكره هتدفي بيه
وهو اللي مستني يتدفي بيكي
في وسط الدولاب المرشق بشر

خليتي ليه قلبك نوى؟
يعشق بقايا الوهم والهم الحزين
فتّحتي ليه كل البيان المقفولين؟!
لما انتى مش حمل الهوى